


GUILLAUME LAFORET

LOU CARRETIÉ DE SANT-GILE



**EDICIOUN PARLAREN
1983**

Parlaren sèmpre nosto lengo...

Crid de raliamen e proufessioun de fe!

PARLAREN, aquéu mouvamen de defènso de la lengo e de la culturo d'oc, es vengu aro lou ferre de lanço de la revendicacioun culturalo nostro.

Lou bèu proumié a mena lou coumbat prouvençaliste pèr carriero. La manifestacioun qu'engimbrè lou 15 de mai de 1982 à Marsiho e que recampè mai de 5.000 persouno rèsto la bello provo de soun enavans e de sa capacita de boulega de mounde.

A la radiò, à la televisioun, dins la prèssò...

PARLAREN es presènt d'en pertout pèr rèndre valour d'usage à nosto lengo.

Famihié de l'edicioun, estènt que publico *Prouvènço, Dau!*, lou soulet journau redegì en entié en lengo nostro (à parèisse de façoun reglado tóuti li mes), e acò desempieì vuech an, **PARLAREN** entameno vuei uno tiero de publicacioun, emé pèr toco proumièro de faire counèisse d'escrivan prouvençau que sis obro soun vengudo inaprouchablo senoun introuvablo, vo que sis escrich an pas agu l'ur d'èstre estampa.

Ansin duerb vuei lou tai em' aquelo meno d'antoulougìo dis obro pouëtico d'un escrivan d'elèi, un pau trop descouneigu, lou felibre-carretié de Sant-Gile, Lafourèst.

Drech e entié, di coulèro legendàri, aquéu rufe carretié cregnié pas de manda tout naut soun franc valentin.

Ome dóu pople, pas gaire gasta pèr l'escolo unitaristo franchimando, a camina soulet, mai "eiretié d'Apouloun" coume disié Frederi Mistral, menavo em' éu lou càrri ensouleia di muso prouvençalo.

E dins aquelo carreto, éu, lou carretié ferun, se tremudavo en pouèto tènre e sensible dóu cor amourous, tant lèu galoi, tant lèu adoulenti, vujant sa pouèsio escrèto e lindo, en toumbarelado umanitouso.

Blasi d'amour pèr sa famiho, prefoundamen estaca à sa lengo, fidèu à sis idèio de justico soucialo, Lafourèst pren liogo au coustat d'un Charloun Rieu vo d'un Anfos Tavan dins lou panteon de la pouèsio d'oc.

Pèr l'aveni de nosto lengo, sis obro s'ameritavon d'èstre tourna mai baiado au mounde. Es causo facho.

N'en fau gramacia la chourmo dis Edicioun Parlaren, l'assouciacioun despartamentalo « Parlaren-Gard », Marc Bernard pèr la prefàci e subretout Pau Blanc e Jan-Lu Malacarne, iniciaire d'aquelo edicioun, sènso óubrida Dono Mario-Jano Sellier, fiho de l'autour que nous baiè gèntamen soun autourisacioun d'estampa.

Bernat GIELY,

Presidènt dóu Mouvamen **PARLAREN**.